

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 12, No. 348

原始資料: 蕭鎮國大德提供, 維習安大德提供之高麗藏 CD 經文, 北美某大德提供, 西蓮淨苑提供新式標點

No. 348 [No. 310(41)]

佛說大乘方等要慧經

後漢安息國三藏安世高譯

聞如是：

一時佛遊於舍衛國，爾時彌勒菩薩叉手白佛言：

「世尊！我欲小有所問，若世尊聽所問者乃敢陳之。」

佛言：「若有所疑便問，吾當為汝解說，使意歡喜。」

彌勒問言：「云何菩薩摩訶薩不退轉法，於大乘有進而不耗減，行菩薩道並降伏魔怨，如其狀貌，悉還教知諸法根之相，不厭於生死，自有正慧不從他受，疾成無上一切智地？」

世尊讚曰：「善哉！善哉！所問隨順，甚善大佳，吾當為汝解說菩薩所得之行，踰於所問。諦聽！善思念之！」於是彌勒受教，一心靜聽。

佛告彌勒：「菩薩有八法具足，疾速得無上一切智地。何謂為八？一者、內性清淨。二者、所行成就。三者、所施成就。四者、所願成就。五者、慈成就。六者、悲成就。七者、善權成就。八者、智慧成就。是為八事。菩薩疾速得無上一切智。」

彌勒菩薩及諸眾會皆歡喜。

大乘方等要慧經